

दिनांक : 11.04.2026

समय : 18.45 बजे

आकाशवाणी जयपुर-अजमेर
प्रादेशिक समाचार

- प्रधानमंत्री नरेंद्र मोदी 13 अप्रैल ने जयपुर मांय माय भारत बजट क्वेस्ट 2026 मांय वीडियो संदेश रे जरिये मोट्यारां ने सम्बोधित करेलां
- मुख्यमंत्री भजन लाल शर्मा बांदीकुई अर बूंदी मांय 677 करोड़ रुप्या ऊं बत्ता खर्च वाळा विकास रा काम जनता ने सूप्या अर नुवा कामां री सरूआत कीनीं
- समाज सुधारक महात्मा ज्योतिबा फुले री जयंती रे मौके राज्य मांय आज केई कार्यक्रम राख्ही ज्यां
- प्रदेश मांय जनगणना-2027 रा पहला दौर री तैयारियां रो जायजो लेवण सारू खास मीटिंग-एक ऊं पन्द्रह मई ताई स्व-गणना प्रकिया व्हेलां

000

प्रधानमंत्री नरेंद्र मोदी रो 13 अप्रैल ने जयपुर मांय व्हेवण वाळा माय भारत बजट क्वेस्ट 2026 ऊं जुड़्या कार्यक्रम ने वीडियो संदेश रे जरिए सम्बोधित करण रो कार्यक्रम हैं राज्य स्तर रा ई जळसा मांय मुख्यमंत्री भजनलाल शर्मा ई शामिल व्हे र जीतण वाळां सागे बातचीत करेलां युवा मामलात् अर खेल विभाग रा अतिरिक्त मुख्य सचिव प्रवीण गुप्ता खबरनवीसां ने बतायो के केन्द्र सरकार कानी ऊं राख्या जा रह्या 'विकसित भारत यूथ डायलॉग' रो समापन 13 अप्रैल ने व्हेलां इण ऊं पैली 12 अप्रैल ने जयपुर मांय 'महिला युवा संसद' अर साइकिल रैली सरीखा कार्यक्रम राख्या जावेलां वे बतायो के ई होड़ सारू प्रदेश रा 75 हजार ऊं बत्ता नौजवान नाम मंडाया हा, ज्यां मांय 984 आखिरी दौर सारू चुण्णी ज्यां

.....

000

महात्मा ज्योतिबा फुले री जयंती रे मौके मुख्यमंत्री भजनलाल शर्मा आज दौसा जिला रा बांदीकुई मांय 607 करोड़ 66 लाख रुप्या रा खर्च वाळा विकास रा 213 कामां मांय ऊं पूरा व्ह्या काम जनता ने सूप्या अर नुवा कामां री सरूआत कीनीं ई मौके श्री शर्मा राज्य रा हर ब्लॉक री एक सीनियर सैकण्डरी स्कूल मांय सावित्री बाई फुले ई-लाइब्रेरी खोलण रो ऐलाण कीनों वे कहयो के प्रदेश रा सगळा जिलां मांय महात्मा ज्योतिबा फुले आदर्श स्कूलां खोली जावेलां मुख्यमंत्री बांदीकुई रा पॉलिटेक्निक कॉलेज रो नाम महात्मा ज्योतिबा फुले रा नाम परां राखण अर बांदीकुई-दौसा बीचे रेलवे फाटक माथे रेलवे ओवरब्रिज बणावण रो ऐलाण ई कीनों जळसा मांय मुख्यमंत्री कहयो के राज्य सरकार गरीबां, किसानां, मजूरां अर महिलावां ने मजबूत बणावण सारू पूरा मन ऊं काम कर रही हैं वे कहयो के सरकार समाज रा हर तबका ने आगे बधावण माथे खास ध्यान दे रही हैं

.....

ई पाछे श्री शर्मा बूंदी जिला रा हिण्डौली मांय राख्ही ज्या कार्यक्रम मांय विकास रा 70 करोड़ रुप्या रा खर्च वाळा काम जनता ने सूप्या अर नुवा कामां री नींव रखीं

000

समाज सुधारक महात्मा ज्योति बा फुले री जयंती आज राज्य मांय सिरधाभाव सागे मनायी ज्यीं ई मौके जयपुर मांय राख्ही ज्या कार्यक्रम मांय राज्यपाल हरिभाऊ बागडे महात्मा फुले री मूरत माथे सिरधा रा फूल

चढ़ायां वे ज्योतिबा फुले ने 'महामानव' अर जमानो बदल देवण वाळा बताता थकां कह्यो के वां री जिन्दगी समाज रा आखिरी मिनख रा भला रो गेलो बतावे हैं

.....

चूरु मांय ज़िला कलेक्टर अभिषेक सुराणा महात्मा फुले रा आदर्शा री चर्चा कीनीं झुंझुनूं मांय ज्योति बा फुले री जयंती रे मौके वाहन रैली निकाली ज्यी, जदके ब्यावर मांय ज़िला प्रशासन री ओर ऊं महात्मा री मूरत माथे फूल माळा चढ़ा र वां ने याद करी ज्यां

000

देश मांय डिज़िटल तरीका ऊं चुकारो करण री यू.पी.आई. व्यवस्था सरू व्ह्यां दस साल पूरा व्हे ग्या हैं भारतीय राष्ट्रीय भुगतान निगम साल 2016 मांय यू.पी.आई री सरूआत कीनी हीं साल 2021 मांय ई नेटवर्क ऊं 216 बैंक जुड़्या हा ज्यां री तादाद बध र जनवरी 2026 तांई 691 व्हे ग्यी हैं वित्त मंत्रालय रे मुजब हाथों-हाथ चुकारा रा मामला मांय दुनिया मांय यू.पी.आई री करीब 49 फीसदी हिस्सेदारी हैं यू.पी.आई अब देश री सरहद ने पार कर र संयुक्त अरब अमीरात, सिंगापुर, भूटान, नेपाल, श्रीलंका, फ्रांस, मॉरीशस अर कतर समेत केई देशां मांय चाल रह्यो हैं

000

राज्य मांय जनगणना-2027 रा पहला दौर री तैयारियां रो जायजो लेवण सारू आज जनगणना निदेशक वीडियो कॉन्फ्रेंसिंग रे ज़रिए जयपुर ऊं अहलकारां सागे खास बातचीत कीनीं वे अलकारां सागे पोर्टल प्रबंधन, प्रशिक्षण अर साधनां री उपलब्धता रा बारा मांय विगतवार चर्चा कीनीं मीटिंग मांय 1 ऊं 15 मई तांई चलायी जावण वाळी स्व-गणना प्रक्रिया ने बेहतर तरीका ऊं चलावण रा हुकम दिया ज्यां स्व-गणना सारू जनगणना पोर्टल माथे जा र मोबाइल नंबर अर ओटीपी रे ज़रिए लॉग इन कर र पिरवार ऊं जुडी जाणकारियां ऑनलाइन दर्ज कर सकेलां सफल पंजीकरण पाछे मिली आईडी ने गिणती सारू आवण वाळा अहलकारां ने बतावणी व्हेलां

000

मुख्य सचिव वी. श्रीनिवास कह्यो है के ईसरदा बांध परियोजना रो काम बेगो ई पूरो कर लियो जावेलां वे आज टोंक ज़िला मांय बनास नदी माथे बणाया जा रह्या ई बंधा रा काम रो जायजो लियां पाछे खबरनवीसां सागे बातचीत करता थकां आ जाणकारी दीनीं मुख्य सचिव बतायो के ई परियोजना माथे राज्य सरकार रो खास ध्यान हैं वे कह्यो के ई बांध रो काम पूरो व्ह्या पाछे सवाईमाधोपुर अर दौसा ज़िलां रा केई गांवां ने फायदो मिलेलां

.....

बंध रा काम रो जायजो लेवण री बगत मुख्य सचिव अहलकारां ने ओ काम तैय बगत मांय पूरो करावण रा हुकम दीनां

000

प्रदेश रा घणखर हलकां मांय लारला चौबीस घंटां रे दौरान पारो दो ऊं चार डिग्री सेल्सियस तांई चढ़्यो बाड़मेर मांय अधिकतम तापमान 40 डिग्री सेल्सियस कने पूग ग्यो, जदके सात और ठौड़ां तापमान 35 डिग्री सेल्सियस ने पार कर ग्यो बाड़मेर मांय पड़ रह्या जबरदस्त तावडा रे कारण दोपहरां री बगत सड़कां माथे अर बाजारां मांय आवाजाही कम रहीं मौसम विभाग रे मुजब आवता दिनां तापमान मांय 3 ऊं 4 डिग्री सेल्सियस तांई री बधोतरी सागे गर्मी रो असर और बधबा रा आसार हैं ई बीचे बीकानेर संभाग रा कुछ हलकां मांय बादळा मंड्या रेहवण री संभावना हैं

000

जैसलमेर मांय राज्य पक्षी गोडावण ने बचावण अर नुवा बच्चा पैदा करण री परियोजना रा चौथा सीजन रा पहला ही महीना मांय 11 नुवा चूजा जन्म्या हैं डेजर्ट नेशनल पार्क रा वन अधिकारी बृजमोहन गुप्ता बतायो के ई सीजन मांय पहलो चूजो 10 मार्च ने जन्म्यो हों गुप्ता बतायो के आं 11 चूजां मांय ऊं 8 नुवी कृत्रिम गर्भाधान तकनीक रे ज़रिए अर 3 कुदरती तरीका ऊं पैदा व्ह्या हैं

.....

000

अलवर री ज़िला कलेक्टर डॉ. आर्तिका शुक्ला शहर री बुधविहार कॉलोनी मांय खोली ज्यी प्रदेश री पहली 'पार्क लाइब्रेरी' सारू जनता अर संस्थावां ऊं किताबां दान करण री अपील कीनी हैं नवाचार रा तौर ऊं विकसित करीजी ई लाइब्रेरी सारू आवता 15 दिनां तांई किताबां दान करी जा सकेलां जिला कलेक्टर बतायो के ई नवाचार रो मकसद पार्क मांय आवण वाळा लोगां अर विद्यार्थियां ने कुदरत बीचे किताबां पढ़बा रो सुबीतो मुहैया करावणो हैं

.....

000

प्रधानमंत्री नरेन्द्र मोदी 26 अप्रैल दीतवार ने आकाशवाणी ऊं प्रसारित कर्या जावण वाळा खास कार्यक्रम "मन की बात" मांय विचार बतावेलं आ हर महीना प्रसारित कर्या जावण वाळा ई कार्यक्रम री 133वीं कड़ी व्हेलां ई सारू आप ई 24 अप्रैल तांई मुफ्त नम्बर 1800-11-7800 माथे राय भेज सको हों ई सागे ई नरेन्द्र मोदी एप अर माय जीओवी ओपन फोरम रे जरिए ई विचार भेज्या जा सके हैं

000